

## Frasch teoterseminaar

*Jarplund.* Et waagiinje 24. än 25. nowämber jäif et awt dånsch följkehuuchschölj önj Jarplund bai Flansborj wi en frasch teoterseminäär. Sunt tiin iir stale feriiine as Friisk Foriining än e Frasche Feriin for e Ååstermååre nü dåtheer seminäär for frasche laieschauspaalere än teotermanschne aw e biinje. Ältens gungt et deerbai amt ööwen än ferbäädern önj e berik schauspal, deerstalen än kroopsårbe, ouers uk et ouerseeten än et årben ma takste kamt ai tu kort. Jarling gäng et uner e önjliidjing foon Gary Funck amt koorisch årben aw e spaalteele, wat sü foole bedjüset as gliktidi hooneln än ham deertu pääsen bewääge. Di dramaturg Peter Nissen ferkläärd, hü huum rucht takste ouerseet än beruchted deerbai uk üt sin iirtiinde lung årbe ma bekände nordtjüsche schauspaalere.

## Årbesdrååwen ma e SSW


*Hüsem.* Bai en årbesdrååwen twasche ferreesere foon e Friisk Foriining än foon e SSW-loondäis- än krisdäisfraktsjoone önj Hüsem gäng et am e frååge, wat e SSW önj e tukamst nuch mör for e frasche mååge koon än hü e partai dåt dan uk eefter büte bränge koon. Et drååwen wörd aw e biine stald, ouerdåt foon e frasch sid önj e jütid kritiik iinjouer e SSW-loonsferbånd ütspreegen wörd, dåt da frasche önj e partai tu oofting ouersänj wårde. Loonssekretäär Martin Lorenzen än fraktsjoonsformoon Lars Harms måågeden kläärd, dåt e loonsferbånd da frasche as likberuchtide måker önj-schucht än uk hål wal, dåt dåt sü blaft. Et wörd am dåt iin än ouder konkreet forheewen tu gåågen fort frasch snååked än oufmaåged, ham önj e tukamst ooftinger tu drååwen.

## Harfstfäst bai Frisia Historica

*Stääsönj.* Awt börstää "Nordlicht" foon önj e Hüneblinger Kuuch heet e frasche madelålerferiin Frisia Historica sin tradisjonål harfstfäst fiird. Et jäif madelålerlik musiik, en noopemårket än grilen än stookbrüüdj. Önj e madelpunkt stöö ouers et turniir önjt schiitjen ma e lungbooge, weer et maning prise tu winen jäif. Gåns nai wus en weedstrid twasche Frisia Historica än en tiim foon e Friisk Foriining önjt wurstgibseln – ma diipfrääsene wurste önjstää for di latje hooltstuk. Ferläåsen heet e floose foon e Foriining. Et fäst gäng tu iinje önj en gruten kris trinamt loogeriilj.

## Fiirstün for Dr. Alastair Walker

*Risem-Lunham.* E Frasche Feriin for e Ååstermååre än e Friisk Foriining hän lååsid tu en latj oufschiisfiir for di schotische språke-moon Dr. Alastair Walker foont Nordfriisk Uurdebökstää bai e Uni Kil. Alastair Walker as iinje septämber ofisjål önj pangsjoon gängen. Sunt mör as 30 iir heet ´r ham fort bewååren än ütbaigen foon e frasche språke inseet, besuners fort Mooringer Frasch. Bai e fiirstün önjt Andersenhus jäif et grööturde foon formååns än -wüste foon e ünlike feriiine. Uk e manerhäidebeapdråchd foon e ministerpräsident, Renate Schnack, heet en gröötis schaked. E fästreede hül Marie Tångeberg, wat ma möre anåkdote en bröket bil foon Alastair Walkers inseeten for e frasche fermadeld.



## Nais foon diling

*Bräist.* E radiosiinjing "Nais foon diling" brängt arken dái foon moundi bit fraidi da aktuåle tisinge üt Nordfraschlönj än trinambai. E siinjing låpt aw e Friisk Funk (96,7 MHz önjt norden / 98,80 MHz önjt sööden foon Nord-fraschlönj) än uk aw lokaale siinjer Antenne Sylt (önjt hiil SöödsLaswik önjt kaabelneet aw UKW 89,8 MHz). Aktualisiird wårt åltens warkeldäis am e kl. 9.00.

**Friiske tisinge arken dái nai uner:  
[www.friiskforiining.podspot.de](http://www.friiskforiining.podspot.de)**

## Carsten än Alfred Boysen Fång

*Bräist.* 2013 wörd wider en sööme giilj üt e Carsten än Alfred Boysen Fång ferdiiiljd. Dåt müülj foon e fång as, e frasche språke önj Nordfraschlönj tu stipen än tu bewååren. Jarling wörden e jöögedspräkeräis foon e Friisk Foriining tu e Føroyar/Færøer än en bökprojåkt ouer di frasche loondäismoon Berthold Bahnsen stiped. Et näist tooch, dåt huum bai e fång am heelp insåke koon, as 2015.

**Impräsum: Friisk Foriining, Friisk Hüs,  
Süderstr. 6,  
25821 Bredstedt/Bräist  
ViSdP: Manfred C. Nissen**